

平谷縣志

卷六上

賜進士出身平谷知縣山右馬佩紱書

集清嘉慶二十六年重脩大神廟
碑字碑者知平谷縣事進士馬佩紱
書丹現存 唐玉書謹識



平谷縣志卷六上

藝文志

文類

傳曰太上立德其次立功其次立言此之謂三不朽然言莫深於文而平邑凡有建立皆有文以紀其實特哀輯關於政教諸文庶觀風者有所考徵焉至於議論精深鑄辭古茂猶其餘事志碑文

平谷明倫堂記

元至正七年三月

洵陽逸士納憐不花

皇元列聖相承詔令國都州縣設立學校張置師牧以行政教

平谷縣志

卷六上 文類

一

天津文竹齋印

開平萬世何其規模隆古軼越漢唐矣蓋以聖由天縱道自人宏盛衰觀於風化忠孝本於人倫然後綱常正義理明而民生遂亘古今而不易考之於經班班可見已惟時守令師儒有賢有愚有志存乎立功事專乎報本祇順德意惓惓于聖門者亦有志溺乎利祿事徇乎苟且徒拘文具切切于肥家者由其闇于君親大義懵于聖賢至教其于志道恢宏之士霄壤不侔矣况乎仕路繁夥存道心者希或有德好君子功垂名教若亂山求玉乃千百之一二焉耳詳憫吾友李敬李明等重諗曰平谷乃薊郡之屬邑京師之僻徑亦當有要路居是任間報切于素

王者如己巳年監察御史鄭立建加號碑設學田增輝聖日播種文風自丙子歲主簿范恕教諭張貴協謀合議以謂斯邑有廟像而無講舍基址狹隘如羽不翼于是出給俸資鳩集衆縉買地構材鼎新明倫堂洎學官居舍朝夕有三德六行之修歲時無一風半雨之憾至戊寅間有胡從先來諭是縣仰瞻廟像祭器慊然俯親講席書籍蔑如于是命匠鎔鑄鑄鼎營飭籩豆九經史籍煥然一新上供春秋釋奠下給師生講習焉此數君子創作於前可謂能矣迨甲申際劉元皓師職三年建學門屏以爲斯文之壯觀增廣田畝以備供需立故金國張侯建廟記

平谷縣志

卷六上 文類

二

天津文竹齋印

以表首創之原繼述于後可謂勤矣自是而後肅恭寅畏神人協和師生有舍庖廩有給百爾器具資之左右愚故曰有志存乎立功事專乎報本今得其人耶經曰故事半古之人功必倍之惟此時爲然蓋將有興于斯故仰聞是言而不惑於中悲夫愚故曰亦有志溺乎利祿事狗乎苟且未暇論其人耶驗吾友之言爲信嗚呼吾夫子之道如太和元氣流行于天地間陶鎔品彙綱紀群生儀範百王師表萬世其盛德大業至矣哉凡有天下國家者可不知所本乎吁微元皓不能明數君子之功微數君子不能伸元皓之志可謂克盡其行所當爲矣予故欣然

筆之以紀堅珉匪特叙二三子之功抑亦可爲來今之勸時至
正七年丁亥三月丁巳日也

重修儒學記

明嘉靖甲申年四月

台峯熊相

平谷縣之儒學在縣之離位勝代以前爲老子宮今之門尚因
之淺狹卑陋加之垣墉棟宇率多傾廢見者病焉嘉靖壬午監
察御史熊公榮以清戎按縣遵制視學嘆曰有司之不職一至
于此何足以稱國家育才興化之意偶過邑人按察副使王公
鏜及之鏜曰鏜爲諸生時固嘗買地拓之矣矧有觀風之責者
乎公乃命官度之計費凡若干倡以贖金聞者響應巡撫都御

平谷縣志

卷六上 文類

三

天津文竹齋印

史孟公春巡按御史盧公瓊總兵都督馬公永叅將呂君昌咸
有攸助以相之不穀亦與焉旣而兩載弗績公自往督之先修
聖殿次展賢廡次建戟門次易櫺星次立禮門次闢義路次拓
明倫堂次實地之偏陷者繚之以周垣表之以棹楔復以餘材
建號十五間以便講習省課有方成之不日輪奐奪目士林爭
氣于是教官率生徒詣相述知縣王謙之言曰學雖隸縣而博
士弟子軍衛居半焉彼此生視忽成淪廢不圖今日有勞諸公
敢乞一言以釋其愧且以詔後人于無窮予曰崇儒重道國家
盛典祇奉于有司者已不多見况憲臺乎哉宜諸君子此有不

能自己者夫天下之藝有文有武而學必曰儒者何耶蓋以文而非儒則爲俗吏武而非儒則爲僉夫俗吏僉夫可以興治戡亂之事望之乎哉故人無擇于軍民必以儒學爲先官無分于彼此必以興學爲重國家之長治久安比隆三代者未有不本諸此謙輩曾知之悉乎且儒者之道不越乎彝倫日用之間推而極之無所不有若上而爲教下而爲學亦道之所當然也公之是舉誠無所負矣至于徒擁皋比不能明是道以覺後人徒衣章甫不能體是道以光國家而徒獲一科第則施施然足矣是果誰之責哉其愧又有甚于有司者尙相與勉之公字以仁

平谷縣志

卷六上 文類

四

天津文竹齋印

號磨溪汝寧光山人起家進士嘗以直言謫官今清戎圻內風力尤擅一時而政之可久皆視之茲學云

重修平谷縣學記

明嘉靖四十二年八月

上海秦嘉楫

考圖籍平谷嘗縣于漢鎮于唐復縣于金元國朝因之古稱慷慨悲歌之區信矣元至元乃立縣學然未知其所以教者果能滌蕩其舊習而率由中國仁讓之風未也自我太祖高皇帝混一區宇臨御天下三十有五載漸磨德義鮮不丕變至我文皇嗣位以幽薊形勢雄偉允哉天府之國遂相與重臣定鼎而遷都焉故平谷遂爲畿服內地首被聖化愈近而愈深其士子服

從學官之教不猶江河之就下愈順而愈速也由是博士弟子奮起而登仕版者蔚爲名卿可槩見矣然廟學歷歲滋久隳圯日甚良有司敦治崇教者雖間有補葺亦以費繁務劇爲懼率皆苟簡可嘆哉嘉靖辛酉夏平谷縣知縣任予彬卜日舍奠于廟覩其庳陋毀隊惕然改容曰縣之廟屋壞神不能受其誰責乃與學官張汝言諸生方文光數曹謀咸曰茲誠有司首務也如財不贏何又轉而謀諸鄉士大夫鄉士大夫其謀同又轉而謀諸耆庶耆庶之謀亦同于是舉邑向風慕義視茲役若不可已者官之吏于斯者捐其祿大夫士之產于斯者捐其貲耆庶

平谷縣志

卷六上 文類

五

天津文竹齋印

之供億于上者捐其力凡木材陶甓黝堊丹漆之需畢具工師巧者擾人顧僦之屬咸集諏日舉事或新或作余適奉璽書蒞平谷詣學謁廟不俟關白而知任子之所尚矣乃移文所治出其帑所贏以助傭費不期月而告成任子舉其緒而請曰爰卽舊址建先師廟兩廡崇廣皆倍昔外有戟門有櫺星門有啓聖祠有敬一亭有文昌祠有鄉賢名宦祠有校官舍三區殿後建明倫堂堂左右翼以神廚庫有崇德廣業二齋戟門前鑿泮池甃三石梁其外橫衢豎二坊東曰興賢西曰育才又于學宮旁地闢爲會講堂左右設宰牲齋宿二所計凡若干楹所需之費

凡若干縉所役之工凡若干人經始于壬戌冬十月落成于癸亥六月敢乞先生大人一言以爲記余欲以不能鑄辭爲解非任子重學校意亦非余廉察有司職也嗚呼孔子之功德被于萬世與天地日月等聖自堯舜而下俱莫能望豈區區崇廟宇修俎豆所能報哉顧業儒者不敢忘其本耳余爲諸生時嘗見爲長吏者一意于錢穀獄訟典幹審畫希聲采譽以求調補視學校之事爲非簿書期會之所急而抹撒漫漶者比比每深陋之今任子爲平谷而以不任學校事爲懼首興是役完舊益新立有成績鬱然畿甸之偉觀俾平谷之子弟益興于學化鄒魯

平谷縣志

卷六上 文類

六

天津文竹齋印

于幽薊更弦誦于悲歌其功豈不偉哉任子業儒而知本者矣余亦業儒者遂因其請而爲記凡與是役者皆得書名于石

重修儒學記

明萬曆六年

邑人倪光薦

平谷縣儒學在邑治南建於元至元間迨我國朝開設學校雖蕩滌舊習而學宮基址無改於舊是故面筆峯之翠麗挹洵川之清光固上遊勝地也而博士弟子遊于其間成人有德小子有造二百餘年文風稱最焉然廟學歷歲旣久圯壞日甚年來良有司修葺者固多其所闕略尙比比然萬曆丙子冬李公來尹是邑下車初卽詣學謁廟與二學官諸士子言曰平谷素以

文名先時甲科輩出概爲名卿胡今寥寥焉八科不第矣此必學宮之有闕陋也忝司提調者烏能追其責乎於焉日夜圖維捐俸金若干兩飭材鳩工諏日舉事凡殿廡堂齋損敝滲漏者葺其所既壞補其所既闕諸牆壁俱施以墁飾又於明倫堂後買地一區築苑以宏其規於先師殿安置金匾於上又書大學聖經於殿後欲諸士子於修齊治平之道觸目警心焉學東義路蔽塞已久啓闢之以利攸往櫺星門前及學東射圃處所地多窪下填築平坦之且繚以圍垣樹以桃李昔之闕而未備朴而未華者煥然改觀矣經始於丙子冬十月落成於丁丑夏五

平谷縣志

卷六上 文類

七

天津文竹齋印

月掌教丘君阿司訓王君嘉猷欲鐫石以傳乞予爲記予竊以爲風氣之通塞聚散文運之盛衰人事之得失係焉今茲重修殿廡堂齊垣舍完舊增新乃其常事惟闢義路則風氣攸通平低窪則風氣攸萃諸士子行將掇巍科入仕版登樞要者在此舉矣厥功顧不偉歟嗚呼公之蒞任未幾他務未遑乃惓切於崇重學宮爲急非徒爲報本爾也其屬望於諸士子者亦甚殷矣諸士子其亦無負公之德意乎李公襄陽人名國觀字次賓貞吾其別號云

重修平谷縣儒學記

清乾隆二十七年

張蘭芳

崇建學校非徒以報祀先聖亦以廣厲賢良也故采芹泮水而知魯道所以盛青衿城闕而知鄭俗所以衰人材之消長風教之隆污雖曰天運豈非人事哉平谷之儒學肇於元至元間明成化五年邑令郭君銘修之嘉靖二年監察御史熊公榮修之至四十年邑令任君彬更大修之鼓舞勸興雖數君子力爲多諒邑中士民亦皆知崇教重道故踴躍勦事不日而成計其時數百年間文教昌明鳳翽鴻儀之彥接迹而升誌不絕書誠有自來也蓋學聖者必以聖域爲根本之地猶人之法祖者必先於祖廟樹不拔之基理固然矣奈何是邑民風土習久而漸弛

平谷縣志

卷六上 文類

八

天津文竹齋印

典禮之場遂任其彫殘剝落李觀所刺朝雨流潦夕天羅宿不能不見於茲也蘭丁丑簡任是邦卜日釋奠於廟見其堂廡敗壞門墻傾圯惻然心傷聞是未理者已百年卽間有補苴而因陋就簡者多矣嗚呼士人朝夕所奉爲依歸者何顧於根本之地且缺焉弗理尙安冀其發名成業哉宜清興以來菁華之士所爲消歇也緣是亟與學官李君長人喬君藍并邑中耆士共謀鳩工而更新之官捐其俸民助其貲取材於山發石於壟凡大成殿東西廡名宦祠鄉賢祠戟門櫺星門及後之啟聖公祠明倫堂悉皆整繕完備黝堊以增其飾墻垣以重其周雖規模

仍舊而氣像一新經始於己卯之春落成于壬午之秋蘭盖時加省試焉竊謂聖道如天其神橫塞海宇周流六虛茫乎無涯際浩乎貫古今本不恃形而立滯迹而存又奚待安土而固亦豈峻宇高墻所得而圍哉然以爲不如是世之人反以聖人之神爲不可憑也不可憑則或疑而或畏之矣昔端木氏有言曰賢人之道日高不高則不尊聖人之道日卑不卑則不親歷朝之制內有太學外有郡學皆特崇其地以爲眞有一聖人在其中若魯恭升堂聞響故事使賢知者望而知歸愚魯者亦仰而不越此則古今立學之深意乎蘭之爲是役也非徒粉飾太平

平谷縣志

卷六上 文類

九

天津文竹齋印

已也實期是役之人上尊聖教下敦實行文章事業以繼先朝則後之視今將大異于今之視昔矣于是敬爲之記

重修文廟記

邑人賈名伸

平谷縣文廟自乾隆己卯邑令張蘭芳重修歲久墮圯崇聖祠尤甚嘉慶丙子余與儒學教諭訓導暨諸同志謀新之衆躍然然未能遽舉也丁丑冬余以白於順天府丞周公督學杜公皆報可其明年春遂偕諸同志倡義勸捐邑人士咸響應乃以三月初吉庀材興工先改建重聖祠高廣倍疇昔以次及殿庭門廡祠宇池橋並明倫堂先後胥就理焉寧朴而堅毋華而脆白

賁之義也已乃鼎新木主于仲秋上丁前請邑令敬謹安設工
既竣衆囑余以爲記余以爲事有似迂而實急者昔漢高過魯
以太牢祠孔子識者謂劉氏四百年之祚實基於此晉之衰也
李遼請修孔廟不報明畢懋康亦請修孔廟報聞而事不行當
是時明亦季世矣抑金章宗有言僧徒修飾宇像甚嚴道流次
之惟儒者於孔子廟最爲滅裂余嘗讀史至此且愧且懼夫道
莫重於尊師政莫先於勸學風俗之所由污隆人才之所由興
替氣運之所由否泰大之關乎天下小之係於一邑循之則治
失之則亂莫不皆然是故人而不學出則無以爲良吏而化民

平谷縣志

卷六上 文類

十

天津文竹齋印

成俗處亦無以爲良士而正身齊家今茲之舉所以興起人心
闡揚風教謂區區爲科名計抑末矣然卽以科名論吾邑在前
明中葉何其盛後何其衰今根本之地氣象改觀有志者可不
思奮然興也耶余忝從諸同志後幸得蒞事而觀厥成敢備述
顛末鐫之於石俾後之人有攷焉諸同志者邑庠生徐豐王大
中崔漢文徐登瀛董是役例得附書

重修平谷縣學宮記

清光緒十六年七月

保陽徐壽朋

平谷縣文廟自乾隆二十七年重修至今已百有二十年殿廡
傾頹墻垣歛仄盖失修久矣邑尊鍾公德輔蒞官斯土慨然以

振興文教爲己任書院考課優加獎勵所以嘉惠士林者無微不至是邑不發科第已數十年前歲戊子王生以謙登賢書在庠諸生爭相摩厲其明效可見矣去冬鍾公勸諭各紳集資修理文廟捐廉爲倡各鄉皆踴躍樂輸於是偕正學張君銜副學馬君成章共謀經始擇紳士董理其事鳩工庀材擇日興作修建經費悉歸董事經理官不與聞自大成殿東西廡文昌宮崇聖名宦鄉賢忠義諸祠及戟門櫺星門俱拆卸重修凡棟梁椽桷之朽者蠹者裂者皆擇良材易之磚石之破碎者剔除弗用明倫堂傾壞無存重爲築基建立又增建文昌三代祠城東南

平谷縣志

卷六上 文類

十一

天津文竹齋印

隅舊有魁星樓亦葺而新之高之是役也計用銀二千數百金自二月十七日興工至七月望工竣不數月間烏革翬飛奩輪並美仰瞻廟貌煥然改觀可謂速矣平谷居京師東北爲洵水發源之地又有盤峯聳秀高峙於側其磅礴鬱積之氣蓄而必發得賢邑宰雅化甄陶行將爲人文淵藪卽今邑中人士見學宮重修亦必鼓舞奮興益動其尊崇先聖之心而愈勵其遠紹前修之志矣豈不盛哉承監修諸君之屬爲記其大概如此

平谷新城記

明成化戊子年二月

淳安商 輅

平谷縣在薊州治西北八十里古之漁陽地今爲順天府屬邑

西連密雲古北口東接山海道經遼東北臨極邊諸大山永樂初置營州中屯衛以鎮之今黃松峪等四關熊兒峪等四營官軍守備者常數千人蓋重鎮也縣故有土城歲久傾圮今右僉都御史閻本奉命巡撫至而歎曰城郭所以衛民况平谷密邇京師爲東北屏蔽兵民于是乎聚儲糧于是乎積非有高城深池將何所恃以爲重乎于是謀諸總兵官東寧伯焦壽左叅將都指揮劉輔皆曰都憲言是也疏請於朝得允爰委營州右屯衛指揮同知袁忠等督軍夫若干增築之城高二丈五尺址廣三丈五尺頂殺址三之二周圍六百丈爲城門四門有甕城甕

平谷縣志

卷六上 文類

十一

天津文竹齋印

城又各置門城之外爲塹闊三丈五尺深半之沿塹植榆柳幾萬株經始于成化丁亥訖工于明年二月功之成視舊加四之三于是居室晏然雖外戶可以無閉防禦之計遠矣僉謂是城也邑小而役鉅不可無文以示來者而縣丞宣謙遂述增築始末來徵予記予惟重門擊柝以待暴客易之有取于豫者素定意也天下事未有不成于素定而况保障爲爲政之首可使之因循廢弛于晏安無事之時乎惟茲城郭旣新人心始安可以奠民居可以廣儲積可以繕甲兵養威蓄銳復何外侮之足慮哉書曰惟事事乃其有備有備無患此之謂也若都憲公可謂

防患于未然者矣乃若力出于閒暇之時而費出于規畫之餘于衆無擾于事有功此善之善者也後之人能嗣而葺之其利閔且遠哉因爲之記

重修城池記

邑人王 鏜

平谷縣治舊無城永樂二年營州中屯衛自塞北徙之腹內安置平谷縣中城始建焉是時草創土築未遑以磚石包砌歲久城崩圯便道者越堞通行若履通衢然成化丁亥大中丞閻公本撫臨茲邑仰而歎曰所賴以保障吾民者城焉耳崩圯如此將何所恃哉爰是命官計財包砌磚石四壁如削壁各設門以

平谷縣志

卷六上 文類

十三

天津文竹齋印

便防守且以漸次置修樓舖以爲瞭望計方經畫之際而轉官之命下矣功不竟就迄今六十餘年嘉靖壬午歲郊圻盜發掩其不備長驅入市剽掠任情居人內外恐怖未安巡撫孟公春兵備熊公相憂之于是協謀設策剿平厥盜地方僅得無恐廼命掌篆指揮季君勳經略保障董工修築缺者補之廢者葺之建樓于諸門之上重簷華棟規制一新東曰接盤南曰觀瀾西曰迎恩北曰鎮遠腰舖隅樓次第結構凡觀之者咸以爲奇峻之功也鎮撫王傑來請于予曰董大事者未始不勞費也季君承委克殫厥心財物廢諸浮屠工力用之閒暇帑藏不減軍務

不妨人不告勞功倏就緒其事偉矣敢乞其文以紀顛末予嘉其績遂書此以應之夫土木之工難成而易敗也廉靜者遠嫌棘欲者歛怨貪求者上疑昏柔者下慢遠嫌則爲己也歛怨則失人也上疑則起咎也下慢則弛事也是皆承委者之通弊也季君承委剗此四弊掩百年因循之咎成一時保障之功其賢能過人遠矣監司憲臣後先獎勞是亦嘉其能爲者歟雖然城池高深固足保障矣借使撫馭乖方人心怨惡雖有粟穀兵甲誰與爲守哉是知守國之道人和爲先地利次之故孟子曰地利不如人和吳起曰在德不在險凡有國家之責者庸可不知

平谷縣志

卷六上 文類

十四

天津文竹齋印

輕重緩急也哉季君有功德善撫馭政事固無容喙矣第恐將來繼之者不知設險守國之義予因丁寧以告云是爲記

平谷縣修城記

明嘉靖四十四年四月

蒲坂張四維

平谷古漁陽地北與胡貊鄰城郭溝池所以爲防禦計者自昔視內地爲急然今圻邑也又介在四山中烽警視諸邊差少是以守土者易焉而備禦益疎縣舊有城池歲久夷阬攀堞往來不異周道今尹任君彬旣視事思以興葺之顧歲祲財詘未足役也癸亥冬寇馬奄至城下任君部率市民分地設方略以守各門于城殪其酋二人陴內始免于危事平之後任君乃禮延

邑之名德巨室間長党正諭將有事城池爲扞圉永策衆驩然稱便遂上其事監司監司咸是之撫臺雲中溫公令守軍採薪燒灰以濟其役按院洛陽董公檄贖鍰百金以佐其費其諸當道若總督軍門劉公屯院秦公關院陳公密雲兵備道張公悉有金穀助焉任君迺自理百餘金爲士民倡邑衆開磚窯百二十所以陶于是諏日戒工富効財貧出力吏殫勤工獻巧城以丈計凡周六百五十撤而修之者過半城舊高二丈二尺增築五尺俾益崇又于城四門各樹以樓匾其東曰挹盤西曰拱辰南曰迎洵北曰威遠城隅增舖舍四又濬其隍文餘沿塹悉植

平谷縣志

卷六上 文類

十五

天津文竹齋印

以柳當四門之衝置便橋焉經始于甲子閏二月廿日竣于是歲六月之望凡五閱月而工成城峻而堅池深而闊屹然改觀民有固志矣任君迺述事始末問記于余余惟備禦不虞政之善經故城郭溝池之固雖襲承平處中夏猶不可一日無戒心焉而矧關塞耶顧列城十百傾夷者半寇至常苦無備何哉則用民之難耳盖患貴于防微而民難于慮始未覩其害而先勤之則勞且怨雖告之以必然不信也平谷城池之建在先無所考而唯見于成化丁亥巡撫閻公之疏請其所述規模建置在當時稱雄厚矣後五十餘年當嘉靖壬午而始重修之以礦徒

之變城已不能支矣迨今又四十餘年因寇警乃復修而加壯焉蓋民有所創則其趨事也易興大役動大衆不得不因乎民耳任君蒞平谷幾年扶敝拯羸煦煦然如慈母之于子而且爲之防患深遠其所以舉羸于力詘獲遂有成事者唯民之因加以賢監司提持而佑濟之者弘也昔成化丁亥城之始建也寔惟巡撫閻公嘉靖壬午則巡撫孟公重修之今茲之舉又爲溫公是賴此三公者域民翰國先事謹備其雄略著在疆圉者前後較若畫一也而茲其一節云

重修平谷縣城池記

清乾隆三十八年十二月

中州朱克閱

平谷縣志

卷六上 文類

十六

天津文竹齋印

粵自黃帝始營國邑後之保障斯民者因之作邑土中俾來獻焉築城伊馭大雅詠焉城向浚洙春秋特書焉命有司坏城郭戒門閭修鍵閉固封疆月令有紀焉故龍見而戒日火見而致用水昏正而裁日至而畢莫不因天之時乘地之利用人之力以爲禦暴保民之所惟茲平邑星分箕尾郡號盤陰北列瑞屏南繞洵水爲神京三輔要地誠天漢之津梁幽燕之關隘也我皇上巡幸盤山省方問俗蠲租免賦賞賚耆民咸被鴻恩於罔極而漁陽重鎮殘缺頽敝其何以壯觀瞻而衛民社乎夫邑治肇於永樂修於成化完於嘉靖文正公商輅邑御史王鏜曾爲

之記至我國朝屹然如故百年以年漸近傾圮邑令鄧君來祚
詳請重修未幾卸事大憲命北路廳李公化楠爲之經始我憲
臺張公在相繼董率竭力殫心功難悉述至謝公洪恩聿觀厥
成而工告竣總爲計之卜吉于丁亥鳩工于庚寅報最于辛卯
約費帑金四萬四千二百有奇而城若金湯池若天塹四門望
樓如跂如矢煥然維新也洵可鞏固於億萬斯年矣余世家嵩
伊丙戌榜前揀發江蘇署清軍總捕篆務改撥直隸歷署灤州
隆平於壬辰夏題署茲邑下車聿始見夫高壘巍峨與妙峯同
其萃嶺陂池淵浩與靈泉共其湛深僉以爲設險守國可爲斯

平谷縣志

卷六上 文類

十七

天津文竹齋印

民保障也豈知其土敦詩書農安耕鑿民性之醇樸民風之敦
龐無形之險隱寓於有形中哉爰於課士勸農之暇稽其始末
珥筆而爲之記銘曰卓爾平邑地近畿輔截薛岢隆去天尺五
山擬嵩少水似洛浦境接塞北城高中土皇仁浩蕩德洋恩普
萬壽無疆永奠千古

修築平谷縣城垣記

民國九年十一月

邑人王兆元

自古圻甸要荒皆築城以禦暴捍難而奠民居故城彼朔方詠
於風詩使壞城郭紀於月令設城旣爲備患之大防則補修尤
爲急務此春秋所以有城必書有築必書也平邑峯巒屏蔽河

流澗洄形勢雄偉畿東奧區而磚石爲城以資守禦惟東北隅
圯鑿五丈餘歷二十餘載當清光緒庚子之戰爭民國初年盜
匪之猖獗城中商民咸以是處爲憂荷槍持矛晝夜防守陴內
幸免蹂躪然亦危矣若再經數年雨水沖流必成爲芻牧之捷
徑馴致防不勝防值此萑苻伏發靡常之際城垣有失必至市
廛焦土居室城墟秩序紛亂全境騷然所關豈不重且鉅哉民
國九年夏月邑長王公蒞任伊始巡閱城垣目擊其處積阨弗
足以禦颶舉烏集之寇爰議興葺民樂輸貲遂委紳董監修啟
工於是秋八月畚鍤雲集登登馮馮閱月餘而訖事巍然堅峻

平谷縣志

卷六上 文類

十八

天津文竹齋印

一如其初事竣囑予爲記予惟是役也雖商民捐貲出工踴躍
翕助董築諸君寔心經理克殫勤勞尤賴公之毅力倡建以觀
厥成盖城爲一邑之重地官署之圖籍文卷存於斯倉廩囹圄
在於斯國欸之收入闐闐之貨幣莫不儲蓄於斯卽一朝有警
村莊之居民車馬亦莫不依託於斯今旣修葺鞏固則衛內翰
外之功偉矣由是重門擊柝有備無患市民晏然利在久遠胥
公之設險防微有以致之也公名沛甫翊漢浙江杭郡人以簡
任職權篆茲邑云

東嶽行祠記

明正德元年三月

邑人金純

平谷縣治西一里有東嶽行祠祠石鼎所載重修于勝國至元三年不知創自何許時我太祖高皇帝混一中原重天地百神之祀凡前代所建廟宇祠觀有益于民者聽民崇祀故邑有嶽祠或歲時水旱癘疫咸祈禱之神亦肆其威靈屢祈屢應每春夏之會俗傳爲天齊聖誕四鄉之人爭持牲醴享賽于庭復爲迎神之舉歷世相沿率爲故事永樂初東軍寇亂祠燬于兵存者無幾正統甲子河東張君鐸來丞于茲首倡士民復興舊址門堂殿廡百爾粗作迨成化甲午營州中屯衛舍人景鐸乃謀于衆曰嶽祠爲吾邑具瞻錫祐深渥張丞雖已圖復而狹隘苟

平谷縣志

卷六上 文類

十九

天津文竹齋印

完不足以棲神衆吾徒安居暇食惟神之庇蓋謀所以新大之可乎于是遐邇翕助得金若干萬緡召匠命工扛材輿石雖三尺童子願輸其勞鳩僦至落成凡十閱月增中之殿爲三間以居天齊殿之左翼一間以居炳靈右翼一間以居府君東之堂三間則爲三義廟西之堂三間則爲聖母殿簾鐘鳴鼓有樓有枹繚以垣墻蔽以三門翬飛跂翼丹碧交輝工雖十倍於前啟之者實二尹之功承之者則舍人之力也祠成景君出資具石將誌其顛末以傳未幾厭世事竟寢息垂三十年景之孫有名源者撫其故石惻然以痛曰吾祖之虔奉于神久矣今祠成而

厥功弗紀數傳之後不幾于泯泯矣乎卽出己金募人緣命工
礮石以畢先志徵予爲記予惟五嶽在天地間依形而立乘氣
而行嶽爲衆山之宗岱又諸嶽之宗也考之祀典天子祭天下
名山諸侯祭境內山川東嶽泰山之有祠宜矣而古今祠祭禮
各不同嶽者地祇也祭之以壇壝而不屋其牲幣祝號則視三
公舜之望于山川是已後世此義不傳自拓拔氏始總立一廟
于桑乾水之陰逮唐復各立一廟于五嶽之麓以及趙宋之衰
而東嶽行祠徧天下矣旣廟之又王之旣王之又像之地祇而
肖像若人焉至於今莫之或改也我聖祖削平僭偽考古創今

平谷縣志

卷六上 文類

二十

天津文竹齋印

一洗先朝之陋而加以泰山之封其示萬世法程至明也凡所
在城邑猶往往祠之者何歟按公羊傳云泰山之雲膚寸雨合
不崇朝而徧天下其潤物之功如此則天下所以尊崇而報祀
之者非過也宜也况祭法有曰能禦大災則祀之能捍大患則
祀之今百靈森布轉異爲祥寧不重可祀也是祠成下以禳災
消變爲民禱福上以祈天永命爲國祝釐此固張丞之志景舍
之心也若源者又可謂聿修厥德肯構肯堂者矣是不可以嘉
尙之哉庸書此以誌其梗概

重修東嶽行祠記

邑人金 濂

粵我朝正大統之三年詔嶽鎮海瀆封號如古制以山水稱凡近世所褒嘉者一切罷去所以揆前聖大中之道而隆一代尊崇之盛典也平谷縣舊有東嶽行祠在縣治西幾一里不知創于何時俗傳爲遼金有國卽有此祠理或然也迨國朝漸加修葺已備于方伯先君所撰之碑據張丞重建以迄于今垂六十年稔閱年旣久土木就隳正德改元歲太原高君來知縣事越明一旦政務之暇諗于衆曰泰山爲諸嶽之宗百神之長仁符震動德體離爲顧廟貌弗修豈吾人所以瞻奉者乎盍共圖之以

平谷縣志

卷六上 文類

二十一

天津文竹齋印

資冥惠衆曰唯唯卽出資市木諏日聚工植仆扶傾易堅去腐工勤材善百廢俱新正殿而外復增一楹以爲軒宇甃砌塗茨舉以法文金秀碧彩繪爛然不侈于前不浮于度是役也其費匪直千緡公不知勞私不知困經始于是年七月落成于次年三月盖始終興率者高尹之勤其合作助成則衆民之力也嗚呼神之動人有如是哉且高之爲縣不立異近名一以誠心感激如修學校新壇壝建橋梁三載之間翕然向緒而此則君之一善耳祠成屬予以記予惟天下之事是非邪正皆可暫欺惟人心不容厚誣今高君一以義舉而民卽義從以心感心盖有

不期然而然者矣又况引之以民生日用之彝諷之以忠君孝親之大而民有不丕應徯志者乎書曰罔迪不適周公曰平易近民民必歸之此之謂也祠旣新祝釐有日爲居民者歆神之福又當思作起者之功則祠之方興固未艾也高君名賢世爲山西臨縣人其功德主則義官張宣耆老巨紳其最者也因爲之記

重修岱嶽行祠記

明萬曆六年五月

邑人倪光薦

皇明統一寰宇建邦設都自京師延及郡邑莫不創嶽祠以闡幽靈我國家二百餘年人心欽崇至今弗替薊鎮西屬邑平谷

平谷縣志

卷六上 文類

二十一

天津文竹齋印

縣治西幾一里舊有東嶽行祠不知創自何時據邑人運使金公所撰碑重修於正統甲子河東張君鐸暨修於正德改元歲邑侯高君謙至今七十餘年閱時旣久廟宇傾圯無以棲神萬曆丙子冬我侯貞吾李公國觀來任平邑越明年丁丑秋八月謁神念及於此乃曰予司茲土神主幽冥陰陽殊迹實相表裏廟制未備乃爲缺典召邑素稱公正太醫院醫官張文遠等數輩示以重新妥神之義捐俸金以爲首倡衆亦矢虔替襄樂輸己貲境內居民聞風願施者遐邇一致得若干緡聚匠命工掄材度宜修正殿三間左修炳靈一楹右修府君一楹東新三間

以居三義西新三間以居聖公聖母前修一樓以便簾鐘鳴鼓門以三座繞以垣墻侷奐互美丹碧交輝工作大異於前經始于萬曆丁丑閏八月初落成於十月終向非我侯政善民安烏能一變通而使民鼓舞不倦倏然就緒如此哉工完文逮等出資礪石將誌其顛末以垂永久屬予爲記予惟鬼神在天地間體物而不可遺况泰山爲諸嶽之宗百神之長能爲民禦災捍患福善禍淫轉異爲祥威靈赫奕祐濟宏深如此則人所以欽崇而報祀之者宜也今李侯廟貌之重豈非誠心感激者乎雖然此特我侯之一善耳他如拓基學宮楷書大學築濬城池鼎

平谷縣志

卷六上 文類

二十三

天津文竹齋印

建橋梁刊頒聖諭嚴審保甲百度振刷斯民安堵尤有不能殫述者祠旣成上以爲聖冲祝釐而安富尊榮下以爲黎庶祈禱而福壽康寧茲固李侯之心也因爲之記凡與是役者皆得書名於石

勅賜興善寺記

明正統十二年十月

毗陵胡澹

興善寺舊名靈泉寺在薊州平谷縣靈泉山北倚妙高峯東臨七合嶺南抵朝陽觀西傍磨鼓嶺泉清木深峰巒峭拔最爲勝地但歷年旣久蔽翳於荒榛荆棘之中永樂年間御馬少監朴公實及中貴院宗堂令僧澤聚往彼駐錫剪荊除礫宴坐其間

殿堂門廡以次興修三十餘年扶衰舉墜靡愛其力以至方丈僧寮庖湏庫庾裝嚴像設鐘鼓香花旛燈供具外則繚以垣墉久廢重興勤勞萬狀其木植顏料工用之費皆朴公喜舍正統八年二月少監朴公適蒙欽差往彼經過覩茲隆勝踴躍歡忻仍念僧澤聚能劬躬盡瘁以廢爲興復捐已貲助其不給使勿墜其成業而益廣其欲爲之志於本年二月二十八日回還以寺未有額名其奏欽蒙聖恩勅賜爲興善寺以僧澤聚爲住持齋捧部符回還緇素四衆瞻仰讚嘆山川改觀草木增輝此誠少監朴公僧人澤聚願力所感機緣遇合殆非偶然也少監以

平谷縣志

卷六上 文類

二十四

天津文竹齋印

茲寺之興未有紀述遂伐貞石徵余文以記之余惟事之廢興係乎時物之成壞關乎數而尤在乎得人爲難然時與數至人固自出今少監與澤聚成此寶坊其秉心也專其用功也勤成始成終豈非時與數至而使然耶如是則可托以永久者有不區區世俗文字之末也姑記其略俾來者有以考構興之歲月云耳

白雲寺記

明弘治十二年九月

邑人金純

白雲寺距平谷縣迤東北約二十里有山曰峨嵋其眷以東又十里爲黑豆谷峯巒還匝草木暢繁實古幽棲之所胡元一統

邊幅不塵大德初有僧名繼廣者集石爲垣採山棟而始構焉
元末蕩爲灰燼入我皇明六十餘年無有因舊而興之者正統
乙丑春濟南繼廣禪師北遊諸刹卓錫于斯仰觀山形俯察地
脉有泉有田遂有由然而不忍去之意乃嘆曰地僻山幽道在
此矣盍結廬以休居無何戒律之嚴聞于遠近居人懷其德賓
旅識其誠僉謂曰興廢舉墜吾師事也師居此而法像不修是
不足以弘慈教盍謀所以爲之已乎師曰吾意也遂募於檀那
而勤於己力閱而如來殿成苟美苟完百廢粗作迨景泰甲戌
秋欽差御馬監左監丞黃帽以上命之邊偶經于寺一接廣師

平谷縣志

卷六上 文類

二十五

天津文竹齋印

叅乘竟日扣其中含弘定止無量無邊卽相與握手曰吾師居
此得無隘且陋乎乃出錢若干萬緡增其三世殿爲三間創左
之堂爲伽藍右之堂爲祖師承堂而構爲居僧之所簾鐘有樓
鳴鼓有枹黝堊丹漆舉以法入其門大殿翬飛金碧相照儼然
一大祝釐地也黃公不以爲德廣師不以爲功垂四十年卒無
發心紀其事者今年師且歿其徒名漣禮者乃曰吾師歿矣而
其功不紀則歲遠必湮遂徵予文以紀之予爲佛西方聖人也
生刹利王家放大智光明照十方世界至漢明帝夢金人飛至
殿庭始入中國歷晉宋齊梁魏隋之間其教寢盛世之供奉者

丹砂黃金文珉香木窮極侈麗葩華絢飭然後爲快苟有疑而
闢之者乃外道魔障佛之罪人集千有年于茲矣予嘗考究其
說大率以念物爲宗以觀心爲法以惠逆凶吉爲因緣欲俾蠢
動含靈同登正覺其利人也亦週且溥矣傳曰欲生惡死利害
私情況恐之以果報輪迴之說有不崇而信之者乎是宜法之
繁昌而說之得行也矧其間傳燈若廣師輩者又從而闢荆棘
畚瓦礫鼓舞而振作之耶是故不可泯也雖然廣師此舉上祝
皇齡下祈民佑功德大矣然有作幻也有相亦幻也其如成壞
之數何哉予曰有形有幻理固宜然惟能卽幻法而證實相則

平谷縣志

卷六上 文類

二十六

天津文竹齋印

天地一廈萬象一身也若是則雖歷塵劫妙運無涯尙何成壞
之足云乎後之繼已完之業享不爲之功有房榻以自安無規
級以相持舉前人勞苦之所辦者適以便私曾市肆賈區之不
若由之而致壞者必斯人也可不切監而痛革乎若漣禮者不
忘師功而勒之堅石固此之反而不群者予因之而有所感矣
殿始於景泰乙亥之三月而落成於明年丙子五月若工興費
經營常事也則不必書

重修慈福寺記

明正德四年重陽日

邑人金純

御馬監太監劉公僧嘗逮事我英宗皇帝忠勤謹慎爲上所知

在中貴間特深眷注公每退食輒私念曰某本山林樗賤遭際
聖明晨夜以興無由展報意平谷爲京畿屬邑而山東卽其近
郊宅幽勢阻地勝泉甘擬造寺一區以爲祝延之所犬馬之心
庶幾少盡籌諮旣久于是出金若干萬緡掄材輿石鳩匠聚工
相隲度原取其地之面陽者構如來大殿列左右爲迦藍祖師
大殿之南爲天王又其南爲山門周以垣墉樹以嘉木由側門
直北則爲方丈爲僧房爲泔浴庖廚之舍爲楹凡六十有奇經
始于正統甲子之春以是年秋仲考成爲日凡百八十基臺崇
拓棟宇翬宏丹碧文珉各呈工巧未幾繪圖以進公遂奏請于

平谷縣志

卷六上 文類

二十七

天津文竹齋印

朝賜名慈福命下之日緇流耆艾咸豫悅奔走樂來贊相若公
者眞可謂問水知源克酬心願者矣始公披地按圖意猶未慊
將欲更營法藏護國轉輪諸殿值北鄙多事扈駕親征致身王
事齋志竟終據今甲子再週閱年寢久寺漸就荒營州中屯衛
官舍景祺居士楊友想其風致憫夫初志之純誠也乃即其所
營之緒繕修粧飾以識不忘且礪石以載其顛末徵予爲記予
惟忠義之在人心不異時而有先後之殊不同時而有彼此之
異劉公所舉本以上報鴻恩假蓮界以爲之地延今五紀寺幾
中絕復得棋友二君以興予意二君亦非作念天堂力超諸苦

果若浮屠說也只以忠義之心激之有不得不然耳嗚呼事有曠百世而相感者其獨人心矣夫至若醜虜跳梁公能奮不顧身卒以保完名節其英風勁氣凜然與東盤大嶺爭高又其事之可書者也因爲之記

龍泉寺記

明正德五年二月

邑人金純

盤龍爲東畿大山蜿蜒以西又十里爲暗峪峯巒峭刻氣勢連霄爲平谷治東之界峪間夾兩涯有泉如練自東北折每春夏雲英英騰上頃刻覆山谷其色正白若大海茫無際涯人因目曰龍泉泉之北巉崖壁立空翠撲人左右諸峯皆相顧拱揖黃

平谷縣志

卷六上 文類

二十八

天津文竹齋印

精赤茯雜植其間境異山幽雖當烈火流金使人翛翛有挾纒意元至正僧人順公結庵于處庵以泉名以誌山川之勝元社不屋基址就荒入我朝百有餘年日漸榛莽成化己丑營州中屯衛舍人景鐸因別墅去庵不遠每肩輿而至輒臨流坐石景與心忘旣乃嘆曰地勝之興將有俟于人乎乃出金市地偕僧可懿協力興復時諸色草創香火僅存迨四門塔僧悟興號太雲者極力苦心徧求檀越得金若干萬緡米若干百石始庀工敦匠建如來大殿于中左爲迦藍右爲祖師又其東爲居僧之所簾鐘枹鼓以樓以亭滷浴堂厨各有次舍雄深瑰麗金碧交

輝偉然一大叢林直與盤龍諸刹相高非昔之庵院比也興之徒曰本寬本源源之徒曰真讓又能承師之志作大士殿于主山之眉建浮屠于案山之表當四時雲物變幻而樓塔出沒于煙霏空翠間潭影光天徘徊上下山川之麗一旦改觀遠近來遊靡不喑喑稱賞寺成于正德庚午邈其經始幾四十餘年衍之者非一僧成之者非一日可謂大且艱矣據今鐸與群師俱先後淪沒鐸之子曰祚讓之徒曰常善恐其功遂泯泯無聞徵予爲記予惟山川之勝必得其人而後可鳴當龍泉兵燹之餘巒光水色頗失故態栖栖于林薄榛莽間殆與凡流衆垓等耳

平谷縣志

卷六上 文類

二十九

天津文竹齋印

今緇流一鼓而幻成寶坊暮鼓晨鐘酬恩駐貴則山川秀麗與有光輝孰其使之然耶昔五峯非自鳴也以普庵鳴湘山非自鳴也以無量鳴他日龍泉爲東盤第一山者又安知其不以悟興鳴也因爲之記

岳侯遺愛碑記

明嘉靖二十年八月

邑人金 濂

嘉靖庚子春清湘蔣公以方伯入爲京兆適審編徭役之期先時各該州縣地畝人丁儘派本州縣原額之差足穀爲止行之旣久法玩弊生殷庶之地反獲其輕窮約之鄉或攫其重官盲吏瞽莫究所由公廉得其情乃藉一府四州二十三縣地之廣

狹丁之多寡田之豐瘠與夫歲徵之緩急輕重通融而均一之務使合併爲公民無偏累章上而命下司徒議覆以行時撫按重臣俱仰承德意飭戒所司協京兆委官竭力秉公求無負皇上軫念斯民之舉檄至而平谷岳侯適當選任乃捧檄加額曰吾志也吾民其尙寧幹止已乎遂撫不便于民者數事乞援當道以蘇民困一查舊管以豁開除本縣原額地一千七十八頃五十一畝節因里墮民消拋荒近半宣德年間撥去興營二衛屯種開除地三百二十九頃三十一畝就彼納糧冊籍可查本縣見在地七百四十九頃寄養官馬七百四十九匹俱係欽差

平谷縣志

卷六上 文類

三十

天津文竹齋印

科道照畝審編別無餘空後因巡撫都御史洪奏添地銀不辨舊管開除照額仍派銀一千七十八兩五錢一分以致終歲包贖膏脂匱竭一審權宜以祛民患永樂年間太監三寶差往西洋偶因舡隻數多暫于附近地方借倩人夫拽送比時順義平谷二縣各出夫六十名實一時權宜之計順義已先革除惟本縣至今歲出銀一百兩號爲通州協濟夫錢事出無名誠爲冒濫一遵成憲以息新科本縣原額漁戶一十三名每年該納課鈔一百一十七貫遇閏加鈔六貫七百五十文正德年間忽遇欽差內官前來採打銀魚無故勾拏漁戶陡添椿木葫蘆羊皮

等料銀二十餘兩遂爲常規一或稽遲官吏輒加凌轢近年以來又坐武清瀋縣水占地畝原編楊村遞運所水夫銀一十三兩宛大二縣車輛銀二十四兩委係地窄民貧不堪賸負若不預爲申請誠恐通融之後控訴無門于是當道悉侯之賢憐民之瘼覈審至三乃于丕平之間均攤公抑帖下計派應存力差三十五頃共銀七百六十兩八錢應存銀差三十七頃共銀七百五兩二錢二忽五毫應減銀力二差銀共八百六十一兩一分五厘自後審編永爲定式侯之心始慰而民之怨始消是雖出於皇上溥天地生育之恩以立斯民之命其割裁補濟將順

平谷縣志

卷六上 文類

三十一

天津文竹齋印

奉行實一二臣工嚮卽百僚之績也而吾邑岳侯亦可驗其心在乎民卒能脫民于積年偏累之中而並置之玉燭春臺之內卽傳所謂民之所好好之民之所惡惡之此之謂民之父母是已後之續良吏者當與魯卓先後相高又不但虎北渡河蝗不入境銷患于一時而已也耆老因不敢諉侯之功囑予爲記勒之堅石永矢不忘予曰侯之遺愛非止一端而民咸不識不知此特鳴其顯著者耳侯名朝用別號嶧山山東鄒縣人前以薊州節判擢爲今職云

重修城隍廟記

明嘉靖三十年五月

邑人金 濂

皇明有天下建邦設都自京師達之郡邑雖遐陬僻壤莫不創城隍廟以闡幽靈故仕是邦者上任必請于斯朔望必禮于斯春秋祭享必告于斯水旱疾疫必禱于斯官秉其忱神應如響自古以來人心宗向罔敢弗欽廟舊在縣治北洪武初拓地面陽構正殿三楹以安神主繚以垣墻門以三座擇道祝以司香燭迨成化己丑歲久漸頽鄉耆王真等合衆繕修舊規咸葺嘉靖辛丑元夕張燈忽遭回祿之變邑大夫嶧山岳朝用倉卒失措援救莫能達旦咨嗟乃召城之父老素稱公正者二三人諭以助工恢復以妥神棲于是營州中屯衛舍人王沐鄉耆周正

平谷縣志

卷六上 文類

三十一

天津文竹齋印

等共矢發心願襄盛舉除侯捐俸及設法處分以供先事外各耆樂出己貲及四鄉著姓不募而來施者雲集霧滃得鈔若干萬緡遂易材於市確石於山鳩匠聚夫先營大殿三間爰及外門高廣各增前之三尺上瓦下甃朽鏝四周殿中塑聖像一龕旁分侍從文璫香木金碧交輝可仰可瞻改觀疇昔經始于是年三月落成于次年八月向非侯之政平民信一鼓而蕭然瓦礫幻成錦坊曷克以臻是哉是亦可以觀政體矣工完沐等勒石以傳乞予爲記予惟天下有不窮之變而吾心有不窮之理誠得其理則變之不窮者皆理之不易也理之所在不外乎人

以不易之理而禦不窮之變焉則規締宏深咨詢周密就有出于範圍之外矣乎廟貌之新固其所也雖然崇墉重隍所以爲民也高堂遠簾所以辨等也一舉而兼盡焉侯之賢又足徵矣謹誌有助於斯役者列之碑陰

重修縣後堂記

邑人金 濂

平谷縣去都城百四十里祖艮山來龍以開疆土當有虞揖位以冀青地廣始分冀東等處爲幽州卽古漁陽上谷之地自我國朝定鼎燕京遂進爲畿輔上遊之地材官甲士駕出他方上嘗以規式詔于土中大小公居周爰執事靡不畢備分署以聽

平谷縣志

卷六上 文類

三十三

天津文竹齋印

各司其所遵行百餘年堂簾弗易而民志定焉詩云風雨攸除鳥鼠攸去君子攸芋又云于時處處于時廬旅于時言言于時語語此之謂也頃者醜虜跳梁閭閻弗靖朝廷委一二重臣便宜勦絕雖屢獲奇功而除惡務本猶未盡寧嘉靖乙卯春馮公來尹是邑立心高古值時勢方殷達觀治所嘆曰高城濬隍練兵防守此其時也將孰貽之遂日夜繕修城郭操演民兵三月之間人心感激又以官居弗盛無以壯我軍威之盛首新憲府以爲觀瞻繼理縣司以安群衆縣中爲正堂右爲幕廳並南向東西列房科各四楹前爲戒石亭又前爲儀門者三門外東爲

土地祠及預備倉西爲罪人獄又合爲大門者三門外列榜房東西各一間此皆前官已修而尙新者也正堂之後爲後堂後堂之東爲書房三間以爲齋宿之所正宅原在東偏宅舍俱新今始移入後堂之後以爲知縣住宅縣倉之後二門之內照前原立公廨六間爲縣丞住宅幕廳西公廨六間爲典史住宅六房吏舍各樹于東鑾駕有亭縣庫有樓悉安善地縣治之界周築夾牆以便巡更之路大抵皆仍其舊磚瓦木石多需素積分毫不取于民經始于是年八月落成于次年五月美輪美奐規制一新僉以爲當誌于石以示將來因囑予言予惟周公之治

平谷縣志

卷六上 文類

三十四

天津文竹齋印

東郊師保萬民民懷其德武公之治衛源盛德至善民不能忘此天理之常存而人心之不泯也今侯蒞任期年而竭忠報國公爾忘私則將來之豐功偉績足以繪凌煙而紀太常者不有光于二公之後也哉後之視今猶今之視昔有必然也若縣僚二尹林公萃縣幕胡公鳳亦皆贊襄于朝夕于法皆得書侯名思忠山東高苑縣人孝川其別號云

科貢題名記

吉豐陳 烜

取士之法其來尙矣成周有鄉舉里選之制漢則有賢良方正茂材明經等科目唐則有進士秀才明經明法明算明書等科

第惟我朝列祖相承酌古準今而以科貢爲取士之法誠曠古之良規也士生斯世何其幸歟夫科貢之設名殊而實一者也游庠序之士以五經四書而端其本領以策論詔誥而廣其經濟科之所錄者此也貢之所升者亦此也初何嘗以名之殊而異今日之所習亦未嘗以途之異而岐他日之所施故漢之董仲舒公孫宏以賢良舉者唐之陸贄韓愈以進士舉者而董仲舒天人三策與陸宣公之奏議百篇同一機公孫宏之表章六經與韓退之之左右六經同一道豈山若樵之河若漁之名殊而實異哉且題名有碑所以紀名氏謹歲月示榮觀垂永久也

平谷縣志

卷六上 文類

三十五

天津文竹齋印

與是列者名固榮矣然名者實之實實者名之主使名著而實不副則亦何足以爲榮哉孟子曰誦其詩讀其書不知其人可乎是以論其世也觀人者其取以爲法焉士登名于茲者必進而友天下之士又進而上春官對大廷而展盡其底蘊以幼之所學而壯行之在廊廟則寅亮天工在臺諫則責難陳善在岳牧則承流宣化樹功業于當時垂勳名于後世俾人之觀斯名也稱其人論其世也美其功如漢唐諸君子之照耀簡冊膾炙人口則實有可稱而名之榮也非溢美矣又何擇于科貢哉先儒有曰所入之途雖異所至之域則同信斯言也于是乎記

平谷縣題名記序

明隆慶六年二月

關中劉愛

圖朝海宇清熙文武昭宣凡登仕籍者罔不以靖共勉厥位而所寓咸題名以識歲庚午不穀以三河倅叨長是邑視篆之日登城埤覽山川眺關塞見山巒萃嶺環然四塞地狹而平一望徹畢方不百里口僅千餘視諸隣封才一里之氓耳余獨怪昔稱富庶而今若此不知昔人何以施爲將欲自考卽詢其故於紳士僉曰昔也地一千二百頃撥給軍屯者五百頃矣昔也戶九千五百五十口兩經大虜蹂踐死亡過半矣里甲照地而應差錢糧照地而增派浮費冗役與諸郡同加而莫之恤額設議

平谷縣志

卷六上 文類

三十六

天津文竹齋印

處與諸郡同視而莫之減矧自總督開府于密雲易偏僻爲衝要編里甲爲驛遞三孱之民蕭條之邑有加而無已如之何而不窮且困也哉不穀履任且年餘矣固不敢以窮且困自諉而景仰前賢每思砥礪期以漸磨而圖之其他城隍之修學宮之葺鄉賢名宦之崇祀道路水患之辟除戶口差役之均平厥旣得奉檄而次第舉行之矣獨縣之題名久無俾前之政無以垂昭勸後之人罔知所法戒誠爲缺典因伐石盤陰構匠而鐫之已往漫無所稽爰自國初之建置以迄今日若尹若丞若幕皆得而書之間有失其籍址忘其資格者闕如也嗚呼今之視昔

猶後之視今也是刻也政事之美惡人品之高下心術之邪正與夫民之好惡因而可考矣邑之人日觀歲覽按今憶昔於茲而較量指數之不將爲一方春秋乎凡我官僚登於斯者皆當猛省賢者師師否者恐恐秉心如石之堅立身如石之直勿負國家之作養毋忝前修之型範以保惠慈祥爲念以清白循良自期毋以褊小爲不足治毋以窮衝而怠其心殫厥忠智凡力之所能爲心之所當盡者自勉焉庶於石丈人無媿矣故序之以爲後之君子告

重修淨寧寺記

明萬曆三年正月

邑人金定

平谷縣志

卷六上 文類

三十七

天津文竹齋印

平谷縣治西十里舊有淨寧寺凡邑侯履任者必駐劄於斯上官經過者必暫息於斯鄉民焚修者必致禮於斯二百年來人心崇向罔有弗欽迨嘉靖年間殿宇傾頽前守牧者雖循良相繼漸次經理尙未獲享其成至萬曆癸酉春疊峯張公自阜城服除來尹吾邑過臨茲寺覩其痺陋毀墜兼以地衝民困則惻然動容即於下車之始展采宣猷釐廢整仆恤流移均徭役不半歲而學校爲之振舉經費爲之節省且增築城垣不辭勞瘁求爲扞圉永策衆驩然稱便越一載而土民之梗化者服矣吏胥之舞文者屏矣訟牒之委積者理賦稅之逋逃者完而邑稱

大治矣迺因政暇之餘復召集鄉民而示之曰修葺梵宮固非業儒者所本務但以此地往來衝區欲創造公館其如財不贏何有義民賈應祥首輸已貲以爲衆倡是以舉村向風慕義有財者捐其財有力者捐其力併別村耆姓緣募而來施者所得若干緡遂易材於市礮石於山鳩工聚夫先構佛殿三楹旁置僧舍十楹後建方丈三楹以爲公館復繚以垣墻闢以大門中崇外敞巍然改觀茲役也不傷公貲不勞民力邑之廢典一朝而舉由是駐劄者有所暫息者有其地鄉民之焚修佛靈之安妥兩有所賴神人胥悅其功雖偉揆厥所自向非侯之政清

平谷縣志

卷六上 文類

三十八

天津文竹齋印

民安曷克以臻是哉噫卽此可以徵德政矣工完應祥輩思勒石以傳謁余爲記余惟古今稱不朽之道有三曰立德立功立言而已盖庇民存乎德壽名存乎功紀功昭德存乎言故采苞作而方叔之望隆出車賦而南仲之業顯六月詠而吉甫之譽彰然有德有功者豈容以廢言歟今我侯之蒞政留心民瘼德固莫尙保障一方功又足稱回視方叔南仲吉甫之業不與相爲媲美耶在撫按監司交相奏薦行且躋華堦登要路其盛德豐功必將紀之於鐘鼎銘之於太常垂芳爲不朽矣又奚俟余言而後顯哉顧沐德政者自不敢忘其本耳遂因其請以爲記

凡與役者皆得書名於後云

賈公遺愛碑

清康熙五十九年五月

嘉善浦文焯

魯家莊在平谷縣治之正西十里許爲順義懷柔之衝素稱富庶自昔年地震以後頻遭荒歉民多流亡遷徙四望邨落幾無烟炊邑令賈君甫下車目擊心惻卽設法招集免其徭役雜差俾得各遂其生業仍爲樂土於今二十年矣而謳歌感激每念父母不去口庚子四月余適奉憲委監修髻髻山其士民相率走請願記之以垂久遠余欣然曰此美政也夫蠡吾平谷地非密邇然余時以公事晤君於保陽官舍見其行李蕭然意致飄

平谷縣志

卷六上 文類

三十九

天津文竹齋印

灑而談及民生利害政事得失津津俱有經濟材竊心儀之遂締交契是乃賈君之仁心爲質已熟悉而周洽其治行卓犖余亦何能枚舉而卽此鄉之民飲水知源永久而益固則其平日之撫循愛養與是邑之秉禮敦讓風行俗美可約略而推也噫何地非民而民之受恩知感何地不如此鄉亦視上之感之何如耳余用是於凡爲長民者有厚望焉乃援筆而爲之記賈君諱龍文字采公山右蒲州人

重建魁星樓敘贊

中州朱克閱

斗魁戴筐六星曰文昌官一上將二次將三貴相四司命五司

中六司祿周禮以樵燎祀之我平邑建其祠於學宮由來遠矣
至於斗魁光連四輔輝映三台燦宇宙之英華開古今之文治
與文昌相等埒世多繪其像以崇祀焉明永樂初建樓于城東
南隅故自丙辰越己未甲科一十六人自戊子迄己卯乙榜五
十六人武魁五人鄉會聯芳名臣輩出二百年間史書不絕也
啓禎而後樓臺傾圮桂蘂莫紀已百有餘年矣天運數週人文
未啓將地之不靈與人之未傑與抑魁樓之未建士志不思奮
與我盛朝菁莪造士棫樸興賢薪樵芘芘著天章於雲漢吉士
藹藹蔚人文爲國華而盤陰一區獨無人焉榮膺鶚薦不負皇

平谷縣志

卷六上 文類

四十

天津文竹齋印

上壽考作人之至意宰是邑者能無愧乎前令來祚鄧公緣城
垣之初建議魁樓之肇修與儒學王君爾烈字瑤峰副學賈君
蒲會集諸生暨闔邑紳士王子樹勳周子開邠徐子植王子雲
鶴等重立是樓以興文教諸子樂出已資更相勸募或分其任
或總其成典史曹君延齡日爲董率時加勸勉辛卯之歲瑤峰
名題鴈塔欽點詞林而功適告竣行見高閣凌空岑樓橫翠筆
掃雲霧千百年之文運重開斗量珠璣億萬載之光華復旦矣
余以壬申鄉貢接任漁陽製燈上元與教諭賈君鳳吟訓導田
翁之錫暨武弁陳君廷良集同學弟子員張兆鳳徐伯常賈名

伸王家客等於樓下講理學源流論經史精蘊及鄉會文體應科律詩諸生咸爭自奮勵日勤課誦思繩祖武而繼前修數年之內必有偉人策名天府備員闕廷前日之盛不將見於今茲哉余深嘉之爰勒石而爲之敘贊曰魁樓數仞峻極於天杓攜龍角榜登虎前衡臨紫極斗掛城邊瑞氣朝映神光夕懸闢茲石室澄我靈泉洵躍金鯉屏生玉蟾文星丕照甲乙科聯勗爾多士有開必先

重修平谷縣倉廩記

清乾隆四十一年十二月

中州朱克閱

古者耕三餘一耕九餘三以三十年之通制國用量入爲出所

平谷縣志

卷六上 文類

四十一

天津文竹齋印

以有備而無患自漢耿壽昌奏設常平倉唐戴胄繼長孫平立義倉朱子在建寧崇安則有社倉我盛朝嘉惠元元兼備焉此平邑倉廩所由建也倉在官署東壁康熙三十年邑令余學昌建修常平倉增字北廩七間興字西廩五間盛字東廩七間其滿字南廩三間半邑令項景倩於雍正十二年建修至乾隆十三年邑令栗培初添建滿字東廩三間裕字廩十二間迄今數十餘載風雨薄蝕棟宇傾圯所貯之穀難免霉黴之虞余三十七年來宰是邑見其墻垣頽敗木料黓朽諸廩滲漏盛字廩七間俱已坍塌四十一年春詳請動項修補六月鳩工九月告竣

共領用銀九百六十八兩有奇由是增興盛滿諸厥咸宏廠壯麗貯穀萬石以陳易新自永裕而無匱矣且夫積貯者生民之大命也貴則減價以糶賤則增價以糶寔心行之民享其利而常平於以常豐或借籽種或借口糧加息免息擇里社殷實醇謹者董其事民沾實惠而義倉社倉悉得人而無弊爲宰者清白乃心平準斗斛復嚴禁胥吏不得侵漁以仰副我皇上體恤民隱之至意疇謂有治法無治人哉是爲記

重修普濟寺記

邑人陳景伊

佛法以方便力引導衆生爲說三乘令超諸苦厄曰大乘中乘

平谷縣志

卷六上 文類

四十二

天津文竹齋印

小乘大乘者普渡一切運載無邊蓋所謂菩薩乘也菩薩者梵語卽華言普濟也茲取以名寺其法宗大乘者也佛之奉禮於世非一日矣粵自漢以來其法卽與聖道並行於中國然聖人所謂君臣父子夫婦昆弟朋友之倫與夫仁義禮智之教語之庸夫愚婦以及頑梗強悍之流或冥然不覺及與之談因果則咸爲之欣然喜恍然悟且有惕然而洗心滌慮者由是言之佛法之入人心不誠深且摯哉以故歷代尊奉之凡通都大邑遠村近里無不建梵刹盛莊嚴爲選佛之場使瞻廟貌者以觸皈依心禮法像者以生敬慕心聞經偈者以動懺悔心他如晨

鐘暮鼓亦無不可以警瞶而發聵噫千百年來舉凡大千之衆
勇發道惠勤探妙根悟有漏之緣證波羅之果者何莫非佛法
之所潛移而默化者乎則信乎其引導衆生超諸苦厄也信乎
其普渡一切運載無邊也其濟之普爲何如耶茲是寺有重修
之舉前後殿各三楹左右佛堂各二楹禪舍山門煥然一新經
始於是歲之春至秋告成衆善等屬序於余余竊因是寺普濟
之名而有普濟之實知佛之爲法實可與聖道並行於今古而
爲之助茲之捐重貲興土木剗剗之舟艫之金碧之以及鯨其
鐘鼉其鼓豈侈也哉亦非是即無以奉世尊而重其教也使徒

平谷縣志

卷六上 文類

四十三

天津文竹齋印

冀我佛之慈悲日逐逐然奉香火勤禮拜爲祈福免禍之舉則
智者所不取而亦非我佛導惡從善之本意然積善與積不善
之間而福與禍亦無不有以隨之矣故爲序而勒諸石謂以誌
重修之勝舉也可謂以明佛法之普濟也可卽謂之忠告用以
規愚而箴頑也亦無不可

創建平谷縣高等小學堂記

清光緒三十年
孟秋

關中張繼信

平谷爲京北之奧區民風椎魯士習樸厚舊有近光書院爲邑
人講習切磨之所自庚子變亂以來庭宇頽傾前後院落亦多
圯缺不完蓋兵燹餘生久已無力修葺矣夫三代之學不外砥

節礪行今則萬國交通非窮天地古今事務之變綜中外政治藝術之全不足以宏濟艱難而挽回夫世運癸卯冬予奉檄來權斯邑下車伊始即以興學堂爲首務幸各紳富踴躍輸捐共集成款二千八百餘金于是鳩工庀材就原日固有之書院葺而新之自藏書樓而講堂而左右兩舍棖桷剝倚者更之瓴甃剝落者易之復於講堂後西隅隙地拓之補之垣之屋之悉遵欽定小學堂規制次第而經營之工既竣乃考取合格學生稟派教員擇日開學課士以本地之財力培養本地之子弟尤願文行交修講求實用一洗從前空疏孤陋之恥是則鄙人所深

平谷縣志

卷六上 文類

四十四

天津文竹齋印

望者耳是役也倡捐修造始終身總其事者徐紳越也司納出入督察工匠則王生泰元王生銘王生坤王生鈴安生學海亦與有力焉茲當工竣落成爰撮大要而爲之記

創立獨樂鎮記

民國十年八月

邑人王兆元

洵河爲平邑之鉅流其上游名獨樂河河旁有莊因名獨樂距縣治二十里居東北境之中蓋吾邑之鉅莊也曩在清代是莊紳民屢請設立集市惜其時官府齟齬終未准行民國六年邑長李公巡閱東隅經過是莊覘其街衢整齊地當孔道應開集鎮以便商民斯時余與徐君適膺此區區董李公委以籌設是

莊集鎮未幾李公去任余恐事寢息遂詳陳立鎮之利益並擬設置辦法數條請縣署以促進行復經邑長光公嘉許施行此爲獨樂鎮設立之始焉厥後幾經波折竭力維繫卒底於成雖時局紛擾頻歲薦饑不無阻碍其發展然商舖旅舍逐漸增多交易往來規模已具且事屬創舉亦非昕夕所能爲功也迨夫年歌大有物產豐民力裕是鎮商業自必蒸蒸日上而成繁盛之區於國稅民生兩有裨益若李公者做日中爲市之制成通商惠工之功其偉績榮名可與斯鎮並傳不朽矣京兆地理志載由莊升鎮可見河流之發達乃理想之辭猶未知經營締造

平谷縣志

卷六上 文類

四十五

天津文竹齋印

者之苦衷也嗚呼光陰荏苒人事變遷當籌設是鎮之初在民國六年秋月俯仰之間寒暑五易李公由平調任永清且卒於籍矣徐君亦於民國八年逝世矣余將之塞北從事戎行辭卸此區之責矣不有紀述則創立斯鎮之顛末久必鬱湮故鐫於貞珉用昭來葉兼以誌感云李公牟平人名樹珽光公桐城人名進琨徐君邑人名樹本中華民國十年八月立

此文登載於縣鄉自治月

刊民國二十三年三月號

重修平谷縣洵河石橋記

民國二十二年十一月

邑人王兆元

粵自秦昭河橋初作時將寒洹杠梁落成皆所以利行旅也川

無舟梁單襄知陳侯之廢教乘輿濟人孟子譏子產之私恩皆言其不知爲政也近世東西各國之勃興亦以修明路政爲先務而其交通聯絡端賴橋梁是橋梁之建築爲古今所重也平谷邑治挹盤門外舊有石橋一不知創自何時東達康莊征人絡繹城市運水路所必經值歲旣久水力之衝激車馬之震盪已日就傾頽且近橋道路沮洳雨後跋涉維艱則重葺洵爲急務維時臨洵陳君蘭圃經理商業於是邦倡議修築慨然以經費自任乃於鄰封集鎮釀銀幣四百有奇邑中衆善亦出工協助遂輿石運灰庀工鳩匠肇工於是年六月撤其舊而崇其基

平谷縣志

卷六上 文類

四十六

天津文竹齋印

較前增高五尺橋之前後道路亦加繕修兩岸均甃以石閱月而竣事鞏固倍勝於疇昔坦途誠便於民行興斯役者可謂心存博濟矣徐君興周等感陳君之義舉僉以應鑣貞珉用示來葉因囑予言予惟我國從來凡建一廟立一祠率多勒石以紀其事大抵非官茲土者捐俸倡修卽居是鄉者出貲共建類此之舉何邑蔑有亦常事也今陳君建橋之際正平邑失陷之時地方士紳之負有職責者率皆遠避陳君以商團長名義應付於大軍往來之間力支危局歷兩月餘城鄉免於糜爛秩序未至紛紜濟此非常之變非陳君孰能膺其艱鉅復能於戎馬控

惚之餘冒暑監修弗憚勤勞經營構造成此輿梁又未用平邑之歎豈尋常之建築所可同年而語哉若陳君之熱心毅力誠有大過人者特並書之以傳悠久是爲記

此文登載於縣鄉自治月刊民國二十三年一月號

重修平谷縣政府記 民國二十二年十二月 寶坻周 鏞

平谷爲冀北邊區漁陽要地設鎮設縣歷來已幾經變易今雖壤地褊小將五十里而邑城屹屹實占天然之形勝余於辛未歲教讀於是邦嘗登陴四望見前瀕洵川後倚瑞屏右臨泐水左映盤峰大好山河縈迴繚繞竊嘆古人之築城於斯也有深

平谷縣志

卷六上 文類

四十七

天津文竹齋印

意焉城形圓其內四周凹而中凸縣署適當通衢寬平爽塏有扼中控外居高臨下之勢惜乎年久失修已無莊嚴氣象除前後堂各三楹外無垣不破有屋皆殘旣不足以壯觀瞻復不足以蔽風雨豈昔之爲有司者皆未之覩耶幸去歲前邑長李公剛倡修前堂西耳房五間西房二間後院東房三間因籌款維艱仍未能一律完繕邑長李公於今歲三月蒞平接篆伊始卽慮棟撓屋壞必須早圖修葺無如戰事所迫戎馬倉皇自不能不急其所當急緩其所可緩不意五月中旬邑境竟遭淪陷地方負責無人府中房舍非焚卽毀縱有未經殃及者亦緣靈雨

過甚坍塌殆盡几案諸器亦遺失一空迨七月事平邑長於中澣復任外觀滿地瘡痕內睹盈階灰燼實爲慘目傷心欲拯災黎撫綏難徧思修公廨經濟多虧在苟且偷安者必藉口兵燹之餘誠不暇飾茲官署乃邑長毅然兼籌並顧開會議擬修署辦法當卽議定修築後院西房三間東院花廳三間廚房二間墻二堵承審處房五間圍墻四面若監獄房四間則翻修之看守所三間則補修之獄牆四圍增高五尺許府用傢具添置若干件並公推商會委員陳君瑞亭建設局長劉君廷弼爲監修員於是九月經始委羣材會衆工次第興築陳劉二君勞瘁

平谷縣志

卷六上 文類

四十八

天津文竹齋印

不辭終日監視縣府秘書科長亦不時督修兩閱月而將所議定之房屋牆垣均修竣所有建築費及購置器具費共需銀六百七十七元僅支地方款項二百七十四元餘計四百零三元均由省款開支至關於司法處及監所之建築費共需銀九百二十二元統由結存囚糧項下呈准動支並未用民款一文是役也吏不畏勞民不驚擾黜華崇實工省價廉雖非美奐美輪已可爰居爰處矣工畢後監修員晤余而言曰修署一役吾儕之微勞原足無道惟邑長籌畫之功及秘書科長贊襄之力均不可沒擬勒貞珉以垂後世囑以爲記余思治其官舍增其舊

制此固有司所當爲也然干戈始息土木大興此又有司所難爲也且近來之爲有司者多有存五日京兆之心成爲畏難苟安之習思經營之匪易與考成而無關此更有司所不樂爲也茲邑長勵精圖治百廢具興能爲有司之所當爲能爲有司之所難爲能爲有司之所不樂爲而秘書科長復能肋成之則誠哉其籌畫之功贊襄之力均不可沒也綜陳君等之所述特記其顛末如此李邑長名興焯字復一山左陵縣人秘書楊君名鍾祥字伯祺我寶邑之俊才也科長陳君名若魯山左陽信人紹曾其別號云

平谷縣志

卷六上 文類

四十九

天津文竹齋印

平谷縣志卷六下

詩類

夫文以載道而詩則言之成文發於吟嘯者也達人君子至止斯地者恒有著作或因事示戒存之足以彰微或懷古屬律考之足以資博亦志之所必載者志詩古

復生柏

南塘老人張天度

山村老宿鬚眉白根撥和雲移小柏慙懃擁護數十年直幹亭亭高百尺歲寒曾不變真心庭雪到腰纔自適明堂大廈構良材正恐工師來選擇奈何亂世生不辰翻有饑民斧斤厄半身

平谷縣志

卷六下 詩類

一

天津文竹齋印

寂寞被戕殘顏色枝條頓狼籍竭來枯槁逮三年不忍風催并日炙鬼薪蚊炷世所珍憂見斬伐無旦夕長春仙子偶經過兩手摩挲言可惜明年太歲在元枵秀葉參差如舊碧異事未免衆人疑不信道人能起號君不見田家荊樹中道枯孝友一感復還甦又不見萊公折竹表忠義插地乃活元非誣况乎得道不可測招乎元氣薰朽株坐令此柏成鬱茂遭遇還勝愚夫愚長春今已歸蓬壺柏爾善保千金軀

平谷道中

山陰蕭鳴鳳

百折崇崗轉未休征駟終日繞溪流黃梨紅棗垂垂熟別是山

城一段秋

同中臺登水峪寺

關中楊 兆

寺門瑤草遶垂楊勝日登臨烟水長
風伯忽扶鵷鵠出山靈徐湧玉虬狂
人間棟宇浮天渚坐上夔龍賦石梁
燕塞相看同濟巨好將塵抱浣滄浪

其二

出入蒹葭帶夕陽石壇花氣晝生涼
萬山迴合崐崙近一水環流琬琰長
赤羽頻年荒稼穡天書此日淨池潢
碧空雲盡月如練夜夜清光照佛堂

平谷縣志

卷六下 詩類

二

天津文竹齋印

隨中丞楊晴川登水峪寺

洛陽徐學古

祗園積翠散斜陽危闕排空咲語涼
白鳥青天泉一曲吟風背日木千章
梅檀清接霜威近雲錦明生舍利光
夫子登臨多勝事應知蘭若有鱸堂

其二

蒼藤古木幾僧房寺宇人傳自憲皇
勝地隔塵連石瀨靈花簇雨拂禪床
朱幡搖映山青破綠水流分酒碧香
漫說天驕歸禹貢指揮人是舊南陽

過水峪寺池邊小酌

關中蕭如薰

禪關最深處殿閣倚山隈翠柏千章暗清泉一道廻

寺東半里許有釣魚

臺曲水環流樹碑其上卽此詩石刻

啣杯留夕照坐石俯蒼苔試證楞伽字何勞

客路催

盤陰積雪

關中劉愛

半山殘雪永難消三月桃花尙未嬌每到清宵閑眺望月明玉

壘倚雲霄

石室清風

鑿開混沌紫雲瑛兩腋涼生爽氣清流火不煩紈扇動瑤臺月殿敢相并

平谷縣志

卷六下 詩類

三

天津文竹齋印

鼓頂朝雲

石竇誰知有蟄龍朝來噓氣映山容遐陬每有雲霓望不比巫山十二峯

洵水晚渡

洵水清漣魚泳時牛羊向夕更歸遲溪頭爭渡誰家子深淺從來要自知

峨嵋聳翠

巉巖秀麗翠如流高入雲間碧玉浮遊客騷人時賞玩只疑瑟瑟在山頭

峯臺夕照

高臺突兀倚晴空遠近霞連草舍紅返照平林鋪綿繡行人常在畫圖中

靈泉漱玉

野寺雲根驟起瀾龍宮噴出碧琅玕清涼遠得天潢派唇齒忽生六月寒

獨樂晴波

獨樂嘉名自古傳况逢紅日正中天澄波渺渺清還靜網罟不驚鷗鷺眠

平谷縣志

卷六下 詩類

四

天津文竹齋印

題八景一律

曲陽李柱明

盤陰積雪四時堅洵水迴舟擁暮煙石室風清分皓月峨嵋山翠插青天晴波獨樂金銀眩鼓嶺同雲雨露鮮更羨峯臺宜返照靈泉漱玉滿前川

自平谷移署青篆

李傑選

自慚糜祿令畿東夕惕朝乾凜至公聖澤如天淪骨髓臣心無地報帡幪一官已見髭鬚白雙印還驚汗頰紅馬上幾番回首處依依皓叟與黃童

盤陰積雪

長白樂克山

皎潔盤陰雪春深尙未消三冬積曙久六出結花牢白日光難
到紅塵勢已遙窮年茅宇下相對步青霄

石室清風

一龕鑿太古日挹萬山風獨立囂塵外誰留秘宇中樵音來杳
靄天籟動高空羨殺歸栖鳥冷然御不窮

鼓頂朝雲

翠嶺形如鼓朝雲頂上封光生旭日影勢變寒山容高隱冲霄
鶴低依偃盖松不勞楚子夢久矣薄巫峯

洵水晚渡

平谷縣志

卷六下 詩類

五

天津文竹齋印

洵水傍京國頻經晚渡來日移崩岸迥沙動片帆開歸鳥飛還
止征人往復迴况當村落近我馬未虺隤

峨嵋聳翠

是山多翠色此嶺獨超羣碧草留春雨青松冠夏雲難容張敞
畫應許漢宮聞傳道峨嵋月清光早共分

峯臺夕照

落日峯臺上登臨暮景收牛羊歸遠陌烟靄滿空洲岫隱餘光
在林深亂彩留鷺瞻東嶺月一嘯萬山秋

靈泉漱玉

靈泉噴碎玉一曲傍山家處處供遊客年年送落花清音雲外
和哀響澗中譁到海須時日安流且莫誇

獨樂晴波

山城傳獨樂清絕野航稀一水陶然瀉群鷗知所歸高涵雲影
淨遠映曙烟微共泛晴波上長吟送落暉

盤陰積雪

邑人馬一驥

誰卸玉龍甲盤陰凝結牢光生八石暎色照五峯高積冷林猿
避深寒穴虎逃會當舒望眼背嶺絕塵囂

石室清風

平谷縣志

卷六下 詩類

六

天津文竹齋印

清風生石室天籟嚮鴻濛草嫩搖新綠桃飛掃落紅眠雲穿窈
窕延月入虛空我欲盈襟袖陶然憩此中

鼓頂朝雲

鼓頂憑誰闢朝雲幾段濃雷門空作想巫女若爲容有色迷殘
夢無聲伴早鐘欲將桐木擊催去直從龍

洵水晚渡

洵水流今古扁舟晚渡開鳥冲烟靄滅人帶夕陽來車馬通幽
薊樵耕跨草萊片帆新月上森森隔征埃

峨眉聳翠

共道三峨峻此峯眞與群勢懸千里月高入九霄雲雨洗嵐光
潔霞明黛色分蠶叢標勝迹垂老恨空聞

峯臺夕照

峯臺凝暮靄煙鳥向林投夕照留荒野歸雲帶戍樓蟾孤燕塞
遠霞散太空收古寺鐘聲急乘風度隴頭

靈泉漱玉

泉靈通萬派玉漱潤千家勢亞瞿塘瀉高翻雪浪花灌秬遺厚
利浸草注深窪終作朝宗思蓬瀛路未賒

獨樂晴波

平谷縣志

卷六下 詩類

七

天津文竹齋印

天光水色合風動練花飛窟靜蛟龍睡機忘鷗鷺肥翠灣浮荇
葉香渚卸蓮衣獨樂晴波晚漁舟載月歸

春日馬家莊見始祖漢大將軍墓有感 前人

水遶山圍列古墳秦時名郡漢時村難同絳帳聯宗譜敢向雲
臺系遠孫學士笙歌標汗簡故侯弓劍沒荒原
先始祖成漢
封全椒侯 煙
花過眼催頭白懶對青青墓草痕

盤山吟

梁永建

畿東屏蔽天下奇羣龍磅礴紛逶迤太行碣石相繆縟幽并連
跨雄 五丁開鑿何年斧神鏤鬼輸驚剗剗中膚外骨萬蓮

鍰蠡攢瓣襲青纍纍葳蕤歷盡飛花片蠹秀苞靈千百變祥煙
兔彩曜陽暉俯瞰滄溟纔一線鷗鵬投翅雲飄揚陣馬騰驤峰
隱現盤旋礲确欵徑行躋身層疊開生面七十名庵半劫灰我
來躡屨蒙蒿萊松杉翳鬱譚禪石枳棘荒涼舞劍臺銀河瀉頂
觸星斗靈湫駭魄驅風雷蟾蜍夜半入丹井琳宮深鎖封莓苔
珠林瑤草蟠清閼巖罅金鐘流梵唄方廣精藍說洞天煉真學
道多茫昧神仙窅冥難詰窮大抵達人具游戲苟能羽化得神
通誰不黃金輕脫屣

秦州臨難詩

邑人王 札

平谷縣志

卷六下 詩類

八

天津文竹齋印

無端反側效螳螂漫自當車攘臂強憤蓄寸心推祖逖悵懷棉
力愧馮唐徒思指日回天短妄想乘風破浪長不爲時窮憂在
面惟羞國耻負君王

其二

壯心如許促行程愛割牽衣妻子情纔別涇泉歌易水思來隴
右斬洪鯨功成願借舌鋒利事濟何須寶劍鳴只有一身酬聖
主那緣竹簡望題名

其三

滿懷忠憤到秦州宛入無人境內遊來至中軍陳教化先觀兒

稚列戈矛詞嚴正論君恩重色赧難禁反側羞寧使一身甘鼎
鑊不教萬里繫宸憂

其四

丈夫有淚不輕彈說到文山心亦酸慷慨定須留正氣從容莫
愧戴儒冠披肝瀝膽成仁易跋扈強梁飲恨難目下自知身首
異千年魂怨卦臺寒

讀平谷縣志詩

邑人賈名伸

西南百里向神州獨冠畿東景最幽欲識桃源何處是四圍山
色一溪流

平谷縣志

卷六下 詩類

九

天津文竹齋印

山似游龍天矯形彎環一帶聳遙青倚天獨占東南勝看取盤
峰列畫屏

註 山在縣東南三十里邑名盤陰取此案盤山之陽爲薊
州陰則平谷

廢置千年溯漢唐金元輿地具參詳環山紀實名難易賸有孤
邨號大王

註 志載縣名平谷自漢始唐改爲大王鎮金復爲平谷縣
元以後因之又載大王務在縣十里

營寨紛紛號紀邨勝朝曾此設中屯近畿百里耕桑地當日邊

防作北門

註 志載營州中屯衛在縣東明史謂永樂元年自故龍山
縣移置於此案中屯衛今邨落尚多有辛寨熊耳營等名

忽訝茫茫世界浮雙崖夾處一泉流此間便已成雲海况乃盤
峰最上頭

註 志稱暗峪在盤山西十里每春雲起頃刻覆山谷若大
海茫無涯際因名龍泉

此亦人間一峴山雙峯指點翠微間遐思羊杜風流在便作襄
陽勝迹攀

平谷縣志

卷六下 詩類

十

天津文竹齋印

註 案峴山在縣南十里

絕嶂橫遮曲逕幽三泉古寺記曾遊憑誰好為勤疏導雞足山
前一綫流

註 志載雞足山在縣東三十五里下有三泉寺

慨想金源首重迴傳流遺蹟半疑猜近郊遊獵當年事猶有邨
名望馬臺

註 志載縣南五里有看花臺東二十里有望馬臺摩鼓臺
北二十里有發箭臺相傳皆金章宗遺蹟

遊獵應知歲幾回看花之外又三臺區區僻境猶如此况乃山

川四望開

註 同上

弓劍橋山卽此無子昂詩句或非誣當年祇謁瞻遺像想見龍鬣墮鼎湖

註 志載軒轅陵在縣北十五里漁子山下今上有軒轅廟

案廟前碑記引陳子昂詩云北登薊邱望求古軒轅臺雲臺良將勇深沉家世南陽故宅尋就國全椒終老後何因踪跡到盤陰

註 志載漢將馬成墓在縣東二里馬各莊有碑云漢全椒

平谷縣志

卷六下 詩類

十一

天津文竹齋印

侯馬成之墓

一戰當年偉烈彰漁陽勝蹟比昆陽漢家十二將軍在掃盡尤來又大槍

註 後漢書光武遣吳漢等追擊尤來大槍五幡及平谷大破滅之

水利經營訴昔賢開渠而北定何先畿東疏鑿成尤易小試靈泉數頃田

註 考明史稿徐貞明爲墾田使興西北水利先治畿東州邑如平谷水峪寺龍家務墾田若干畝

斷岸誰安略約橫半容流水半人行中間有漏根因在聽取珠
噴萬斛聲

註 案水峪寺有漏水橋橋環植楊柳綠陰滿地真消夏灣
也余爲之語曰平橋飛瀑

潏灑連邨望眼賒香風披拂到山家遊人似覽西湖勝十里波
光十里花

註 高邨稻地二莊並有藕塘在盤山以西數里余亡友張
桐崗兆鳳嘗爲之語曰十里荷香

似小西湖一鑑開蓮塘咫尺意悠哉鄰邨偶趁微風便時有清

平谷縣志

卷六下 詩類

十一

天津文竹齋印

香吹送來

註 案蓮花潭在余家放光莊西里許亦有藕塘

洳水洵水大小殊試方獨樂有殊乎僂奚博陸源流在忍令偏
遺滄海珠

註 水經注洳水出北山山在僂奚縣故城東南東南流經
博陸故城北逕平谷縣故城西東南流注於洵河案故
城在西北十二里城子莊今水道與水經注不異

鼓頂城山未一遊遺文還向水經求絢城故址今茫昧更有誰
知五百溝

註 水經注洵水自平谷縣故城東南南逕絜城東而南合五百溝水水出七山東逕平谷之絜城東南入於洵河戡亂元須應變才揭竿蜂起向城隈神君破竹能迎刃良莠區分一跪來

註 志載邑侯牟公雲龍平土寇事大略聞故老言土寇起時公聞變亟部署兵衆出城寇已至城西將薄城公遣人大聲傳呼諭賊衆曰脇從者跪衆紛紛跪遂得其渠魁斬之士寇平民立廟祀公今東門上坡有牟公祠

歎息貞珉何處求蟠根仙李舊風流我疑漢水濱堪問可有碑

平谷縣志

卷六下 詩類

十三

天津文竹齋印

曾向此投

註 案邑侯李公傑選有去思碑紀善政數條皆實事會遵新例仆碑今不知其碑文尚可考否

夙契廬江政蹟彰口碑隨處足推詳峰臺八十年來事尙有家一瓣香

註 案邑侯何公輝寧在任時有旗人某倚勢奪峰臺莊民人田訟甚健公察其情卒以田歸民人民人感甚舉莊皆爲位祀公于家

每念殷勤勸課情古心如復對先生邑庠夜火晨雞外聽取人

家紡織聲

註 案邑侯朱公克閱余所從小試及課文師也性謹厚喜
談文諄諄勸人攻制舉業士風漸變又作機杼之具以
教人由是邑人習於織

平谷官署

青陽陳其名

山城如斗大終日卻安恬政簡能藏拙民貧易養廉惜花晨掃
徑待月夜開簾退食無他事惟愁酒債添
繞城三十里計戶四千餘地薄多旗產塵空半客居膠庠兼稼
圃商賈帶樵漁所喜民風古能容吏治疏

平谷縣志

卷六下 詩類

十四

天津文竹齋印

袁簡齋曰敘述小邑精確不移而政事之清閒亦可於言外
想見

春日郊行

難得春雨降况當雨後晴烟濃垂柳重風細落花輕上市傭工
集 平谷縣西關有人市傭工者俱集此謂之上市 沿途賣餅聲勸農惟宰職載酒事郊
行

修白龍潭路

青洞山前路年年預備過穿崖平石磴担土疊沙河本為祈雨
澤何妨補晚禾 路係新開地民間候夏至差竣補種晚禾 通長四十里不敢說勞多

遊邑東名勝

邑人王兆元

庚申歲之秋民國九年十月修志續已往余曾事纂輯繪圖歷邊壤晴

明得遠觀山川若指掌徘徊古跡間夕照等處輒為憩息悠然

寄遐想石徑通村隴嵐氣日夕爽節雖近初冬蔬圃尙堪賞樽

酒話西窗宿於山莊開門星辰朗萬籟寂無聲但聞流泉響曉起至

三泉寺名幽邃絕氛块咨嗟寺主人清福未能享寺為清端方購置擬隱居後因

縈懷利祿慘亡於蜀褰裳履巉巖登覽龍泉寺樓殿半頽圯院址成田地

呼僧旋煮茗捫苔校碑記龍泉寺記係方伯金純之傑作文甚高古俯視水潺潺尋

源問童穉斜陽客路催不盡盤桓意途中策蹇行侍隨有警吏

平谷縣志

卷六下 詩類

十五

天津文竹齋印

天暖似春融樹色猶新翠是年深秋無霜遙望樹綠如春此遊多佳景縱筆誌

其事與君久睽違何以慰離思賦就長篇詩迢遞飛鴻寄

留別平谷士民

渤海何師富

盤陰從政二年餘花落庭閒似隱居虛譽偏邀解組後良心不

負到官初臨風且喜清盈袖載學那能富論車此去淑陽猶未

遠待償宿債畫詩書

一聲河滿倍神傷久宦他鄉似故鄉舊政還聞新令尹今朝權

別古漁陽泉清豈爲出山濁雲懶偏因作雨忙莫笑宰官無長

物臨行贏得鬢添霜

金石

金類無

平谷縣古塔內遼陀羅尼經石刻考

平邑縣治西北隅現存之塔其上截曾經頽圮係因其舊基而重修者高三丈餘非如其舊塔高出城頭勢凌霄漢爲一邑之傑觀也惟陀羅尼經石刻仍存塔之東西兩壁間共石二方一尙完好高一尺三寸八分寬一尺九寸一已殘缺高一尺五寸二分寬一尺九寸八分書法高古刻工亦精按重修古塔誌所載塔自唐開元年創建遼及明迭次重修但是塔建於唐代無可考其石刻載有陀羅尼經唐開元朝沙門

平谷縣志

卷六下 金石

十六

天津文竹齋印

不空奉詔譯云云誌文卽誤以塔亦建於開元又據石刻既係重熙十二年記足徵是塔創建於遼時爲確也至明宏治初年邑人張檜張禴兩都憲髻年時二人閒步郊外其兄檜見野花滿地偶成一聯云野外黃花金釘釘地弟禴遙矚城郭卽對曰城中白塔玉鑽鑽天工對絕倫至今傳爲佳語話以此證之則明代塔猶完好又按清代平谷續志內地地震記云康熙十八年七月平谷地震古塔傾頽考清史亦載康熙十八年七月京師地震詔羣臣各言政事得失平邑距京師僅百餘里必係同時地震以清史記文互相考證則是塔圮於

地震時無疑矣此後雖經重葺因捐貲艱窘未能修復原狀
爲可惜耳茲考此石刻並誌其古塔之由來云

遼

尊勝陀羅尼幢記石刻 存 正書 清寧十年 在城內第

一區公所

金

三泉寺碑 存

順天府志正書大定二十四年四月在平谷雞足山下馬家
莊東北

平谷縣志

卷六下 金石

十七

天津文竹齋印

節度使巨構墓碑 佚

金石考在平谷縣南八里

元

蒙古文碑 存 大德三年 在縣城北二十里蕭家院寺內

復生柏詩石刻 存 至元二十五年 在縣城東北二十里

南獨樂河莊延祥觀內

明倫堂記 存 全文見藝文志

順天府志納憐不花撰正書至正七年三月在平谷學宮

明

勅賜興善寺記碑 存 禮部尚書毗陵胡濙撰 太常少卿

直文淵閣永嘉黃養正書 右柱國太保成國公鳳陽朱勇

篆 正統十二年十月 在縣城東北二十里水峪寺內

按胡濙官至少師天順七年八月卒贈太保謚忠安 見明史

雲峯大禪師功行碑 存 承旨講經賜寶藏圓融顯密宗師

播陽道深撰 太常少卿直文淵閣永嘉黃養正書 右柱

國太保成國公鳳陽朱勇篆 正統十二年十月 在縣城

東北二十里水峪寺內

平谷縣新城記碑 佚 商文毅公輅撰 成化四年二月

平谷縣志

卷六下 金石

十八

天津文竹齋印

全文見藝文志

東嶽行祠碑 存 山西布政使金純撰 陝西延安府通判

倪恩書 正書 山東新城縣知縣郝瑄篆額 正德元年

三月 在縣城西北 全文見藝文志

岳侯遺愛碑 佚 山東都轉運司運使金濂撰 河南按察

司副使王鏗書 刑部主事范愛篆 嘉靖二十年八月

全文見藝文志

重修平谷縣學宮碑 存 巡按直隸監察御史秦嘉楫撰

順天府學訓導文彭書 正書 平谷縣學訓導張汝言篆

額 嘉靖四十二年八月 在城內孔子廟 全文見藝文

志 平谷縣修城碑 存 張四維撰 倪光薦正書并篆額

嘉靖四十四年四月 在城內關帝廟前 全文見藝文

志 碑列賜進士出身翰林院國史編修文林郎分校永樂

大典蒲坡張四維撰按張四維至萬歷三年八月進禮部尚

書入東閣 見明史

登水峪寺詩石刻 存 關中楊兆書 在水峪寺內

按楊兆字夢鏡陝西膚施人進士明隆慶五年總督薊遼龍

王峪之戰親冒矢石以火攻卻敵明年敵至馬蘭峪復敗之

平谷縣志

卷六下 金石

十九

天津文竹齋印

萬曆四年以密雲舊城湫隘疏請於城東建新城為重障從
之旋擢官入閣士民立生祠以祀卒謚襄毅 見密雲縣志

登水峪寺詩石刻 存 洛陽徐學古書 在水峪寺內

重修城隍廟寢宮碑 存 山西道監察御史金定撰 戶部

浙江清吏司主事張磐書 萬曆三年七月 在縣治北城

隍廟內

御祭工部尚書贈太子少保倪光薦墓碑 存 萬曆十四年

九月 在縣城北門外半里許

過水峪寺詩石刻 存 關中蕭如薰書 萬曆癸丑暮春

在水峪寺東里許釣魚臺上

清

湖南督糧道牛公神道碑 存 湯金釗題 正書 道光十八

年四月 在縣城外洵河東岸

碑列賜進士出身光祿大夫經筵講官吏部尚書國史館副

總裁教習庶吉士年愚姪湯金釗拜題按湯金釗於道光十

八年五月調為戶部尚書協辦大學士 見清史

重修平谷縣學宮碑 存 道員徐壽朋撰 正書 光緒十

六年七月 在城內孔子廟 全文見藝文志

平谷縣志

卷六下 金石

二十

天津文竹齋印

按徐壽朋於光緒二十七年六月授為外務部左侍郎 見清史

璣記

丹鉛錄并妍縣有掘地者得一釜鐵色光瑩將來造飯少頃卽熟一鄉皆異有爭之者不得曰於縣令命取看未至堂下失手落地分爲二中乃夾底心縣一符文不可辨旁有八分書諸葛行鍋四字又麻城毛柱史鳳韶爲子言近日平谷縣耕民得一釜以涼水沃之忽自沸以之炊飯卽熟釜下有諸葛行鍋四字鄉民以爲中有寶物乃碎之其複層中有水火二字卽前物也異哉世所傳有划車弩雞鳴枕不一而足

諸葛

武侯故事第四卷制作篇

平谷縣志

卷六下 璣記

二十一

天津文竹齋印

平谷縣外城門甕城門所用鐵釘作虎頭狀同於都城及宮殿之制相傳倪尙書光薦夫人入宮見其門釘摩挲愛玩請於皇后得用之故平谷城門有虎頭釘自辛卯歲修城惟用於甕城門今猶存

明代平谷舊志載有距城四里閻家莊馬圈莊二村近百年來邑中所屬久已無此村莊詢之故老尙能指其遺址訪其處則禾黍高低無一居室惟農人耕地猶有犁出房基者則信乎其昔爲村落也相傳清順治六年七月白蓮教匪揭竿蜂起直薄城下經邑令牟雲龍率兵衆擊潰並勦滅閻家莊馬

圈莊廬舍爲墟由是二莊遂廢焉

清康熙十八年七月平谷地震極重城鄉房屋塔廟蕩然一空遙望茫茫了無障隔惟王札居宅與其嫂李氏旌表牌坊屹然無恙若鬼神呵護之者或因王札官鞏昌罵賊殉節其兄王楫早故妻李氏二十一歲守節撫孤奉親一門忠孝之所感歎然亦異矣

縣西北胡家務莊張希武生而無手兩臂僅有肘及長從師讀聰穎能文以兩肘夾筆書小楷快且佳清咸豐八年應童子試府丞學政皆疑其假冒召至案前面試始信遂遊庠一時

平谷縣志

卷六下 瑣記

二十一

天津文竹齋印

各縣同考人多祈書箠以觀其異踰年應歲試又補增生若武者可謂不自暴棄者矣

縣西魯各莊張芮氏生有二子夫郁文爲人傭光緒某年初秋令二子刈草莊外見道旁遺有皮袋內貯白銀數百兩兄弟藏置草簍內舁之歸對氏言之氏驚曰此失銀者性命所關也倘有不測奈何且貧富有命外財豈能利己也宜詢失銀者而還之言次郁文適歸家促使偵訪係張各莊鎮某號商人自平邑運來銀兩在道馬驚所遺者氏催郁文父子趕夜送還該商號甚感激失銀者尤戴德靡涯酬以銀堅弗受因

顏義還遺金匾額以光其閭

京兆地理志載平谷縣人民淳樸選舉時無賣票惡習

見其書百二十

九章縣志編輯曰選舉係國民之特權賣票乃各處之通病而

平谷獨無其弊可徵民風之質厚京兆志所載蓋紀實也茲

錄邑長郭公遊三泉寺詩一首以誌風俗之椎魯山裏人家

自不同清晨策蹇望梵宮楓林鬱密泉聲上樓殿參差樹色

中歎我未逢全勝日斯民猶是太初風天寒訪戴論秦漢

至戴

區董朝賓家休憩談及秦漢史事擾擾塵懷到此空郭公名廷謹陝西蒲城

人丙子進士光緒三十年知縣事

平谷縣志

卷六下 璣記

二十三

天津文竹齋印

密雲縣尉自珍善詩詞其遊平谷水峪寺五言律策蹇來幽境

蒼松掩寺門波光搖樹影日色冷苔痕殿圯僧猶在碑殘字

尚存寒山餘暮靄歸去近黃昏重九登平谷城七言律秋到

重陽客未歸滿城黃葉正霏霏羣鴉向晚隨雲捲旅雁驚寒

作陣飛極目關山猶宛在舊時風景已全非登臨不禁蒼涼

感翹首盤峰帶夕暉

平谷縣志卷六下終

